

14 pemandu bas ditahan kerana guna syabu, methamphetamine, THC

Oleh [Asrol Awang](#) - Februari 21, 2024 @ 2:07pm
bhnews@bh.com.my



Foto NSTP

KUANTAN: Seramai 14 pemandu bas dikesan menggunakan bahan terlarang di seluruh negara sepanjang 21 hari Ops Khas Musim Perayaan Tahun Baharu Cina (TBC) 2024.

Pengarah Kanan Penguat Kuasa Jabatan Pengangkutan Jalan (JPJ) Datuk Lokman Jamaan berkata, mereka yang ditahan itu disyaki menggunakan bahan terlarang seperti syabu, methamphetamine dan tetra hydrocannabinol (THC).

Beliau berkata, mereka ditahan di terminal bas sebelum kenderaan awam itu bergerak ke destinasi masing-masing.

"Ia hasil daripada pemeriksaan dilakukan JPJ yang berkolaborasi dengan Agensi Antidadah Kebangsaan (AADK).

"Bagi tindakan selanjutnya, JPJ akan memanggil syarikat pengendali bas berkenaan dan laporan siasatan lengkap akan dikemukakan kepada Agensi Pengangkutan Awam Darat (APAD) untuk tindakan mengikut Akta 715.

"JPJ juga akan menggantung lesen pemandu berkenaan mengikut Seksyen 36 Akta 333 selepas pengesahan lanjutan diperoleh daripada AADK," katanya pada sidang media di sini, hari ini.

Lokman berkata demikian selepas Ops Motosikal, Kenderaan Pengangkutan Awam (KPA) dan Kenderaan Perkhidmatan Barangan (KPB) di pintu gerbang Gambang di sini.

Hadir sama, Pengarah JPJ Pahang Kamarul Iskandar.

Ops itu turut membabitkan kolaborasi akan strategik iaitu Jabatan Siasatan dan Penguatkuasaan Trafik (JSPT), Jabatan Imigresen Malaysia (JIM), Jabatan Perhutanan Semenanjung Malaysia (JPSM), Jabatan Alam Sekitar (JAS) dan AADK.

Beliau berkata, sepanjang tempoh itu juga, sebanyak 21,705 KPA diperiksa dan daripada jumlah itu, 32 KPA disita.

Katanya, sebanyak 1,181 saman dikeluarkan atas pelbagai kesalahan iaitu teknikal, tiada lesen vokasional, Lesen Kenderaan Motor (LKM) tamat tempoh, tiada Lesen Memandu Kompeten (CDL), tiada insurans dan LKM.

"Kesalahan utama yang dilakukan pula memotong di garisan berkembar, langgar lampu isyarat merah, menggunakan telefon bimbit dan memandu di lorong kanan secara berterusan," katanya.